

07. oktober 2004

UKA2004/37

**Inuussutissarsiutit siuarsarnissaat pillugu Inatsisartut inatsisaata**

**allanngortinneqarnissaa pillugu**

**Inatsisartut inatsisissaattut siunnersuut**

(Unnuisarfinnik pilersitsiniarluni taarsigassarsiniarnissamut aningaasaateqarfiup  
("Unnuisa-fonden") atorunnaarsinneqarnissaa)

**pillugu**

**Inatsisartut Inuussutissarsiornermut Ataatsimiititaliaata**

**ISUMALIUTISSIISSUTAA**

**siunnersuutip aappassaaneerneqarnerani saqqummiunneqartoq**

Inatsisartut Inuussutissarsiornermut Ataatsimiititaliaat suliarinninnermini ukuninga inuttaqarpoq:

Inatsisartunut ilasortaq Ole Dorph, Siumut, siulittaasoq  
Inatsisartunut ilasortaq Ane Hansen, Inuit Ataqtigiit, siulittaasup tullia  
Inatsisartunut ilasortaq Otto Jeremiassen, Siumut  
Inatsisartunut ilasortaq Finn Karlsen, Atassut  
Inatsisartunut ilasortaq Per Skaaning, Demokraatit

Inatsisartut Inuussutissarsiornermut Ataatsimiititaliaata ulloq 5. oktober 2004-mi siullermeerinerup kingorna Naalakkersuisut inatsisissatut siunnersuutaat misissuataarpaa.

**Aallaqqaasiut**

Inuussutissarsiutinik siuarsaanermini aaqqissuussinerup nutarterneqarnissaanut atatillugu aalajangiinnermi Naalakkersuisut "Unnuisa-fonden"ip, 1997-imili unnuisarfinnik pilersitsiniarnerni minnerunngitsumillu takornariaqarnermik tapersiisartup, atorunnaarsinneqarnissaa pissusissamisoortutut nalilerpaat.

Inuussutissarsiutit siuarsarneqarneranni aaqqissuussaaneq nutaaq, ukiup 2004-p 2005-illu nikinneranni atuutilersussaq ilaatigullu ingerlatsivinnik marlunnik allannguinissamik imaqartoq Inuussutissarsiornermut, Nunalerinnermut Suliffeqarnermullu Naalakkersuisoq saqqummiussinermini allappoq.

SULISA A/S iluanaarniarluni ingerlatseqatigiiffittut (aningsaliissutinik isumaginnittarfik) allanngortinneqassaaq. Greenland Tourism A/S inuussutissarsiutit siuarsavigineqarnissaannut ingerlatseqatigiiffittut allanngortinneqassaaq, takornariartitsinerup iluani ingerlatanik suli ingerlatsisussaq ilutigisaanilli aallarnisaasartunik nunamilu inuussutissarsiornermik suliffeqarfinnik siunnersuisarnermik isumaginnittassalluni.

Tassungaluuna atatillugu unnuisarfiliortarnernut taarsigassarsisitsisarnermi aningaasaateqarfik pioreersoq pisariaarutissasoq, taamami attartortitsineq ingerlatseqatigiiffiit marluk nutaat killiliussiffigineqarnerisa iluini isumagineqarsinnaammat.

Naalackersuisut oqarnerat malillugu aningaasaateqarfiup suliniutai ukiuni kingullerni marlussunni uninngatinneqareersimapput. Naalackersuisulli oqaatigaat Unnusa-fondenip atorunnaarsinneqarnissaanik siunnersuut takornarianut allanullu unnuisarfiliorniarnernut tapersiisarnermi periarfissat peerneqarnissaannik kissaataangitsoq. Akerlianilli ingerlatseqatigiiffiit marluk nutaat killiliussiffigineqarnerisa iluini anguniarneqartumut taarsigassarsianik ingerlateqqiisoqarsinnaammat pisariillisaanissamik kissaatiginninnerup ersiutaatut taanna taaneqarsinnaavoq.

### **Inatsisissatut siunnersuutip imarisaa**

Aningsaliinernik aqqissuussinerit namminersornerullutik oqartussanit aningsaliivigineqartut assigiiaat, aqutsivigineqarnermikkut pisariaqarneranit anertunerusumik aningaasartuuteqarfiusut pigiiinarnissaat pinngitsoortikkumallugu aningaasaateqarfiup atorunnaarsinneqarnissaa Naalackersuisut siunnersuutigaat. Inatsisartullumi inatsisaat atorlugu aningaasaateqarfik atorunnaarsinneqartussaavoq.

Taamaammat siunnersuut taanna atorlugu kapitalip, aningaasaateqarfimmut tunngatillugu inatsisip aalajangersagartaanik imaqartup peerneqarnissaa Naalackersuisut siunnersuutigaat. Kinguneqaatit iluarsiffigineqarnerinik siunnersuut aamma imaqatinneqarpoq.

### **Ataatsimiititaliap suliarinninnera**

Naalackersuisut oqarnerat malillugu siunnersuut ulloq 5. juni 2004 tusarniaassutigalugu nassiunneqarpoq oqaaseqaatissanik nassiussinissamut ulloq 16. juni 2004 killiliullugu. Siunnersuut Greenland Tourism A/S-imut – Takornariaqarneq pillugu Siunnersuisoqatigiinnut, Ingerlatseqatigiiffinnut allattoqarfimmut, DeR-imut, SULISA A/S-imut, Unnusa-fondenimi siulersuisunut, Akileraartarnermi Pisortaqarfimmut aamma Aningsaqarnermut Pisortaqarfimmut tusarniaassutigineqarsimavoq.

Greenland Tourism a/s-ip inuussutissarsiutit siuarsarneqarnissaannik aqqissuussinissamut siunnersuut naapertuuttusoq isumaqarfigaa. Ingerlatseqatigiiffinnut allattoqarfik teknikkimut oqaaseqaatit saniatigut oqaaseqaatissaqanngilaq. Aningsaqarnermut Pisortaqarfik, Akileraartarnermut

Pisortaqarfik, DcR Sulisa A/S-ilu oqaaseqaateqanngillat. Aningaasaateqarfiup atorunnaarsinneqarnissaanik siunnersuut Unnusa-fondenip siulersuisuisa tusaatissatut tiguaat.

Inuussutissarsiutit siuarsarneqarnisaannik aaqqissuussinerup allangortinneqarnissaanut Naalackersuisut tunngaviusumik isumaat tassaavoq aningaasanik amerlanerusunik atuinngikkaluarluni inuutissarsiornerup ineriartortinneqarnerata annertunerulersinneqarnissaa. Allangortitsinerup ingerlatsinermi aningaasanik amerlanerusunik landskarsimit nuussivigineqarnissaanik pisariaqartitsisoqanngitsoq Naalackersuisut isumaqarput. Ilinniartitaanermut immikkoortumut pilersaarut inuussutissarsiutillu inerisaaneq – aningaasanut inatsisit – aqutigalugu iluanaarniarluni ingerlatseqatigiiffimmut kiisalu suliniutinik nutaanik aallartitsinissamut aningaasanik nuussisoqarnissaa qinnutigineqarpoq, nutaamik siuariartortitsinissamik siunertaqarluni aallarnisaasartunut suliffeqarfimnullu taakku pingaernerutillugit iluaqutaasariaqartut Naalackersuisut isumaqarput.

Inatsisartulli inatsisissaattut siunersuutikkut ugguuna, unnuisarfiliorniatunut taarsigaasarsisitsisarfirmut aningaasaateqarfiup (Unnusa-fonden) atorunnaarsinneqarnissaa kisimi pineqarpoq. Naalackersuisunut ilaasortap soorlu allaaserigaa, siunnersuut inuussutissarsiutit siuarsarneqarnissaanut aaqqissuussinerup allangortiterneqarnera siuliani eqqartorneqartumut attuumasuteqarpoq. Allangortiterineq taanna Inatsisartuni immikkoorsillugu suliarineqassanngilaq AIS 2005-imilli suliarinninnermut atatillugu saqqummiunneqarluni, assersuutigalugu kontuni tulliuttuni 17.02.11-mi, 64.10.16-imi, 64.10.17-imi aamma 64.10.20-mi taamaallaat takuneqarsinnaavoq.

Inuussutissarsiutit siuarsarneqarneranni pissutsit atuuttut pitsanngorsarniarlugit Naalackersuisut sulineranni ataatsimiititaliamit tapersersorneqarmata qularutigineqassanngilaq. Siunnersuutip isumaa ajunngilluinnartuusoq ataatsimiititaliamit tamarmiusumit isumagineqarpoq, taamaakkaluortoq isumaliutigilluagaallunilu piareersarneqarluarneqarsimassasoq erseqqissarneqassaaq.

Maleruagassanut tunngaviit assigiit siunnersuummi matumani kontunilu taaneqarluni pineqarput, ullormullu oqaluuserisassanut toqqaannartumik immikkoortunik naleqquttunik allanik peqanngimmat siunnersuut una kisimi, iluanaarniarluni ingerlatseqatigiiffik nutaaq inuussutissarsiutillu siuarsarneqarnisaannik aaqqissuussineq nutaaq immikkoorsillugu Naalackersuisunik oqaloqateqarnissamut tunngavissisutut ataatsimiititaliap isigaa.

Taamaattumik apeqqutit arlallit akineqarsinnaaqqullugit ataatsimiititaliap Inuussutissarsiornermut, Nunalerinermut Suliffeqarnermullu Naalackersuisoq Johan Lund Olsen ataatsimiinnissamut aggersarpaa.

Aggersaaneq apeqqutitalik Naalackersuisunullu ilaasortap akissutitut allagaa ilanngunneqarput.

**Ataatsimiititaliaq isumaqatigiittoq siunnersuummut ima oqaaseqaateqarumavoq:**

Aningaasateqarfiup suliniutai ukiuni kingullernili unitsinneqareersimammata aningaasaateqarfik ukiuni kingullerni iluaqutaavallaarani atuussimavoq. Taamaattumik siunnersuut ataatsimiititaliap tapersorsorpaa.

Ataatsimiititaliamit aamma maluginiarneqarput siunnersuuteqartup oqaaseqaatigisai makku:

- Aningaasaateqarfiup aningaasaatai pigisassanngortinneqassasut aammalu aningaasaateqarfiup pisussaaffii suliassaalu ingerlatseqatigiiffimmut aningaasaliissutinik isumaqatiginninniartarfiusumut, inuussutissarsiutit siuarsarneqarnissaannik aaqqissuussinerup allannngortinneqareerneratigut 1. januar 2005-ip kingornatigut suliassanik isumaginnittussamut isumagisassanngortinneqassasut naatsorsuutigineqarpoq.

- Allattoqarfittut suliassamut aningaasaliissutit inuussutissarsiutit siuarsarneqarnissaannik aaqqissuussinerup allannngortinneqarneranut atasumik isumaqatiginninniartarfittut ingerlatseqatigiiffiup pilersinneqartup suliassaanut malinnaatinneqassasut naatsorsuutigineqarpoq.

- Inuussutissarsiutit siuarsarneqarnissaannut ingerlatseqatigiiffik pilersinneqaaqqammersoq aammalu ingerlatseqatigiiffik aningaasaliussanik isumaqatiginninniartarfik aaqqissuussinerit allaffitsigut aqunneqarnissaanni kiffartuunneqarnissamik isumaqatigiissuteqarfigineqassasut naatsorsuutigineqarpoq.

- Annaaneqaratarsinnaasunik aningaasaliisartutut ingerlatseqatigiiffiliornermi niuerneramik aallaaveqarluni annaaneqaratarsinnaasunik utaqqisinnaassuseqartunillu ingerlatseqatigiiffiup aningaasaliissuteqartarnissaa siunertaasoq Inuussutissarsiornermut Ataatsimiititaliap paasivaa.

Taamaalilluni saqqummiunneqartut tunngavigalugit siunnersuutip Inatsisartunit taperserneqarnissaa **ataatsimiititaliap isumaqatigiittup inassutigaa.**

Taama oqaaseqarluni Inatsisartut Inuussutissarsiornermut Ataatsimiititaliaata siunnersuut aappassaaniigassanngortippaa.

Ole Dorph, Siumut,  
Siulittaasoq

Ane Hansen, Inuit  
Ataqatigiit, siulittaasup  
tullia

Otto Jeremiassen  
Siumut

Augusta Salling  
Atassut

Per Skaaning  
Demokraatit

[Ilanngussaaq 1](#)

[Ilanngussaaq 2](#)